

## Puseletso ea Ho qetela ea Bonngoe



### SABATHA MANTSIBOEA

#### **Bakeng sa Boithuto ba beke ena Bala:**

Johanne 14:1–3, Esa. 11:1–10, Tsen. 21:1–5, 1 Ba-Thes. 4:13–18, Tsen.. 22:1–5, Esa. 35:4–10.

#### **Teman'a Khopolo:**

“Empa re reletse, ka pallo ea oona, maholimo a macha le lefatše le lecha moo ho loka ho ikahetseng teng. (2 Petrose 3:13).

**E**'ngoe ea litšepiso tse kholohali tsa Bibe ke tšepiso ea Jesu ea ho khutla hape. Ntle le eona, ha re na letho, hobane tšepo ea rona e itšetlehile tšepisong eo le seo e se bolelang ho rona. Ha Jesu a khutla ka maru a leholimo, sohle seo eleng sa lefatše le se entsoeng ke motho, sa nakoana, seo ka nako tse ling se senang thuso, se tla lahleloa matjoing. Kamor'a lemo tse sekete leholimong, lefatše lena le lintoa tsa tsa lona, likomello, mafu, le likoluo, le tla nchafatsoa e be lehae la balopolloa, qetellong, ba boelane le Morena oa bona le bana ba bo bona. Tšepo ea ho tla ha bobeli ha Krete ke 'moko-taba o moholo Testamenteng e Ncha, 'me esale Bakreste ba laba-labela phethahatso ea tšepo eo. Le rona re le Baleti ba Bolokang Letsatsi la Bosupa re tsetselela ho khutla ha Hae. Ruri, lebitso la rona ka bo-lona le phatlalatsa tšepo eo. Thutong ena ea ho qetela, re shebana le tšepiso ena le seo e se bolelang malena le bonngoe ba Bakreste. Hangata bonngoe ba rona ho Krete bo qholotsoa ke likhaello le mefokolo ea rona. Empa ha re na hlola re tlameha ho batlana le litharollo tsa hoba lihlopha-hlopha hobane li tla be li le sieo. Ho khutleng ha bobeli, re tla ba bang le Morena, qetellong re kopane hape 'me re etse lelapa le le leng le buselitsong.

*\*Ihute thuto ea beke ena ho lokisetsa Sabatha sa la 29 Tšitsoe.*

## Ho Tiea ha Ho khutla ha Kreste

**Johanne 14:1–3 ke tšepiso e tummeng ka ho fetisisa ea ho khutla ha Jesu lekhetlo la bobeli. Tšepiso ee e u bolella'ng malebana le mofuta oa bophelo oo balopolloa ba tlang ho bo phela lefatšeng le lecha?**

Balumeli ba pele ba ne ba nka ho khutla ha Jesu e le tšepo e “lehlohonolo” (Tite 2:13). Ba ne ba lebelletse ho phethahatsoa ha boporofeta le litšepiso tsohle ho tlang ha bobeli, hobane ke schlohloho sa leeto la Bokreste. Bohle ba ratang Kreste ba shebela pele, tsatsing leo ba tla khona ho arolelana setsoalle le Eena fahleho li talimane. Mantsoe a Hae litemaneng tse na a bontša bohaufi-ufi le katamelano eo re tla ba le eona, eseng le Jesu feela empa le bana ba bo rona.

Bakreste ba lumela tšepisong ena hobane Bible e re tiisetse ka phethahatso ea eona. Re na le tiisetse ena hobane re lumela mantsoeng a Jesu, “ke tla boela ke boee” (Johanne 14:3). Hantle joalokaha ho tla ha pele ho porofetilo, le ho tla ha Hae khetlo la bobeli ho porofetilo, le Testamenteng ea Khale. Pele ho moroallo, Molimo o ile a bolella Mopateriareka Henoke hore ho tla ka khanya ha Mesia ho tla felisa sebe. O ile a porofeta, “Bonang Morena o tlile le bahalaleli ba hae ba likete-kete ho etsa kahlolo holim’a bohle ka baka la liketso tsohle tsa bonyefoli, tseo ba sitiloeng ka tsona, le ka lipolelo tsohle tse thata, tseo baetsalibe bao ba ba nyefoli ba li buileng holima hae” (Juda 14, 15). Lilemo tse seke pele Jesu a e-tla lefatšeng lena, Morena Davida le eena o ile a porofeta ka ho tla ha Mesia ho tla phutha batho ba Molimo. “Oa tla Molimo oa rona, o keke oa khutsa, o etelloa pele ke mollo otimeletsang, o teetsoe hare ke sefefe se tšabehang. O bitsa maholimo le lefatše hore li tle kahlolong ea sechaba sa oona, o re: Mpokelleleng baratuoosa ba ka, eleng bohle ba entseng selekane le ’na ka sehlabelo.” (Lipes. 50:3–5).

Ho tla ha bobeli ha Kreste ho hokahane haholo le ho tla ha Hae ha pele. Boporofeta bo porofetileng tsoalo le bosebeletsi ba Hae (mohlala, Gen. 3:15; Mikea. 5:2; Esa. 11:1; Dan. 9:25, 26) ke metheo ea tšepo ea rona litšepisong tsa ho tla ha Hae ha bobeli. Kreste “O hlahile hang ho felisa sebe ka ho iketsa sehlabelo. . . ka mokhoa o joalo, le eena Kreste, ha a setse a ikentse pheko hang ho jara libe tsa ba bangata, o tla bonoa la bobeli, a se na sebe, ke ba mo lebeletsang hore a ba pholose” (Ba-Heb. 9:26, 28).

**Tsela tseo u ka fumanang tšepo le tsoalo le khutsitseng hona joale tšepisong ea ho tla la bobeli ke efe?**

## Tšepiso ea Ho Khutlisetsoa

**BalaEsaia 11:1–10. Ke tšepiso efe e fuoang Israele, 'me e reng ka lehae la ka ho sa feleng la balopolloa?**

---



---



---

Bibele e qala ka pale ea tlhohleho ea lefatše (Genese 1, 2). Ke tlhaloso ea sebaka se setle se neng se tšepetsoe batsoali ba rona ba pele, Adama le Eva. Lefatše le letle-letle la khotso bakeng sa batho ba lopollotsoeng (Tšenolo 21, 22), empa khetlong lena ho nepahala ho feta ho re popo-bocha, ho khutlisetsa lefatše bo-loneng ho tsoa hleke-hlekeng ea sebe. Libakeng tse ngata, Bibele e phatlalatsa hore lehae lena la balopolloa la ka ho sa feleng e tlabana sebaka sa 'nete, eseng toro kapa monahano feela. Balopolloa ba tla bona, ba utloea, ba latsoe, ba ame, ba be le maiphihlelo a macha, bophelo bo bocha. Boporofeta ba Esaia 11 ke serapa se setle se porofetang ho tla ha Mesia, ea tlang ho etsa qalo e ncha. O tla felisa ho loana hohle, a tlise khotso e sa feleng. Puso ea Molimo lefatšeng lena le lecha e tla thakhola kutloano ea ka lefatše lohle.

**Bala Tšenolo 21:1–5. Ke sefe se tla nyamela ka ho sa feleng e le litholoana tsa kutloano e ncha ee?**

---



---



---

Ellen White o ngotse ka se emetseng balopolloa: “Ha mengoaha ea ka ho sa feleng e haroloha, e tla tlisa tšenolo tse babatsehlang, tse bileng li nonneng ka Molimo le Krete. Joalokaha tsebo e le ntho e tsoellang pele feela, ka ho tšoana, lerato, hlomphe, le thabo li tla eketseha. Ha batho ba ithuta haholo ka Molimo, le lerato la semelo sa Hae le tla eketseha. Ha Jesu A senola menono ea topollo le likatleho tse hlollang ntoeng e kholo le Satane, lipelo tsa balopolloa li nyakalla ho feta ke ho mo khumamela, 'me ba tiisa ho letsa liharepa tsa bona tsa gauta haholo: 'me likete-kete tse likete tse likete-kete tsa mantsoe li kopana 'moho ho bina pina e matla ea thorisoo.”—Ellen G. White, *The Story of Redemption*, maq. 432, 433.

**Ke ka tsela life tseo re ka utloisisang, le hona joale, semelo sa Molimo? Ke joang ho phelisana ha monate le ka kopano le ba bang ho senolang, le hona joale, se seng ka semelo le sebopeho ea Molimo?**

## Tsoho le Likamano tse Khutliselitsoeng

Ho tloha matsatsing a pele a kereke, tšepiso ea ho khutla ha Krete, mohlomong ho feta eng kapa eng, e tuisitse lipelo tsa batho ba Molimo ba tšepahalang, haholo-holo nakong tsa liteko. Ho sa natsoe lintoa tsa bona tse tšabehang, ho sa natsoe meokho le bohloko ba bona bo sa tšeliseng, ba na le tšepo ea ho khutla ha Jesu le litšepiso tsohle tse tsothang tseo ho tla la bobeli ho li fupereng.

**Bala 1 Ba-Thsalonika 4:13–18. Ke litšepiso life tse kenelletseng moo? See se re'ng ka tšepo ea likamano tse tla khutlisetsoa?**

Ho khutla la bobeli ha Kretse ho tla ama batho bohle haholo. Eleng karolo ea bohlokoa ho thomeng 'muso oa Molimo ka ho bokella bakhethoa. “‘O tla roma manyeloi a hae a letsang literompeta tse molumo o moholo, hore a bokelle bakhethoa ba hae ba meeng e mene, ho qala pheletsong e 'ngoe ea maholimo ho isa ho e 'ngoe.’” (Matt. 24:31). Nakong ea pokello ena, ba mabitleng ba lokileng ba tla tsoosa 'me ba apesoe ho se shoe (1 Ba-Kor. 15:52, 53). “Ba shoeletseng ho Krete ba tla tsoha pele” (1 Ba-Thes. 4:16). Ona ke ona motsotso oo bohle esale re o lebella. Ba tsohang mabitleng ba tla kopana le bao esale ba laba-labela lerato le boteng ba bona. Ke ka mokhoa ona Pauluse a nyakallelang ketsahalo ena: “‘Oena lefu, e kae tsenene ea hao na? Oena lebitla, ho kae ho hlola ha hao na?’” (1 Bakor. 15:55). Ha se litopo tse shoeleng, tse tsofetseng, tse kooafetseng tse theohtseng mabitleng tse tsoang teng mohla tsoho ea bafu, empa 'mele e mecha, e sa shoeng, e phethahetseng, e seng e sena matheba a sebe se entseng e bole. Bahalaleli ba tsoisitsoeng bafung ba fumana maiphihlelo a sehlohlo sa mosebetsi oa Krete oa ho ba khutlisetsa, hore ba senole setšoantšo sa Molimo se phethahetseng se neng se reruoe tlholehong. (Gene. 1:26, 1 Ba-Kor. 15:46–49). Nakong ea ho tla ha Krete la bobeli, ha balopolloa ba shoeleng ba tsoosa, bahalaleli ba ntseng ba phela ba tla fetoha, le bona ba fuoe, 'mele e mecha, e phethahetseng. “Hobane e ka khona ho bolang hona ho apare ho sa boleng, le ho soang hona ho apare ho sa shoeng.” (1 Ba-Kor. 15:53). Kahona, lihlopha tsena tse peli tsa balopolloa, ba tsoisitsoeng le ba fetotsoeng ba ntse ba phela, “ba nkeloa hammoho marung. . . ho ea khahlanyetsa Morena 'moho sebakeng. 'Me ka mokhoa o joalo re tla ba le Morena kamehla.” (1 Ba-Thes. 4:17).

**Mehleng ea rona mahlale, le Bakreste ba bang ba leka ho fumana tlhaloso ea tlhaho nthong e 'ngoe le e 'ngoe, le eona “mehlolo.” Ke sefe seo tšepiso ea tsoho e re rutang sona mabapi le hore na hobaneng re ka pholosoang ke liketso tsa Molimo tse phahametseng tlhaho feela?**

## Lefatše le Lecha Bakeng sa Balopolloa

“Hobane bonang, ke ea bopa maholimo a macha le lefatše le lecha; tse fetileng li keke tsa hlola li hopolooa, li keke tsa khutlela mehopolong hohang ’” (Esa. 65:17). Esaia le Johanne (Tšen.21:1) ba bone pono ea lefatše le lecha le tšepisitsoeng.

**Nahana ka tlhaloso ea Johanne ea motse ona o majaba-jaba oa balopolloa, Jerusalema e ncha, ho Tšenolo 21:2, 9–27. Ke sefe seo litemana tsee li se bontšang ka bonggoe le kutloano tse tla ba teng motseng oo?**

**Bala Tšenolo 22:1–5. Noka ea bophelo e phallang ho tloha teroneng ea Molimo le sefate sa bophelo mahlakoreng ke ntho tse ling tse peli tse ikhethang motse-mocha ona. Sepheo sa tsona e tla ba sefe lefatšeng le lecha?**

Sefate sa bophelo, seo Adama a ileng a lahlehelo a ke sona ka baka la sebe sa hae (Gen. 3:22–24), Kreste o tla se khutlisetsa Jerusalemeng e ncha. Ho fumana sefate sena ke e ’ngoe ea litšepiso tsa ba tlang ho hlola (Tšen.2:7). Ho beha mefuta e leshome le metso e ’meli ea litholoana ha sona, mofuta o mocha khoeli le khoeli, ho ka ’na ha e-ba lebaka la hore lefatšeng le lecha “ ‘Ka khoeli e ’ngoe le e ’ngoe ha e roha, le ka Sabatha e ’ngoe le e ’ngoe, mefuta eohle ea batho e tla tla khumama pel’a ka, ho bolela Jehova ’” (Esa. 66:23). Ho buoa ka “pholiso ea lichaba” ho boetse ho toboketsa sepheo sa Molimo sa ho tlosa mekoallo eohle lipakeng tsa batho le ho khutlisetsa batho sepheong sa Hae sa mathomo: ho khutlisetsa batho, merabe, le lichaba lelapeng le leng le senang likarohano, le phelisanang hamonate ka khotso, le kopaneng ho isa khanya ho Molimo. “ ‘Pholiso ea lichaba ho ka emela ho tlosoa ha lipuo le maleme ohle ao eleng marako. . . makhapetla a sefate a folisa mahloeano har’a lichaba. Lichaba ha li sa na ‘balichaba’ empa li kopane hoba lelapa le le leng e le batho ba ’nete ba Molimo. ([bapisa] 21:24–26). Seo Mikea a ileng a hakanya lilemo-lemo pele ho moo joale sea phethahala: ‘sechaba se seng se ke ke sa tsohela sechaba se seng ka lerumo, ha ba sa tla hlola ba ithuta nto. Ba tla lula e mong le e mong ka tlas’a feie ea hae le ka tlas’a morara oa hae, ho se ea ba tšosang’ (Mikea. 4:3–4; [bapisa] Esa. 2:4). Mono mabopong a noka ea bophelo balopolloa ba tla ba tla biletsang e mong le e mong’ (Zakaria. [3:]10) ho lula tlasa sefate sa bophelo. Matla a makhasi a sefate a ho folisa a tla folisa maqeba ohle— a merabe, liboko, mefuta, kapa lipuo—tse ranthantseng le ho arola batho lilemo-lemo.”—Ranko Stefanovic, *Revelation of Jesus Christ: Commentary on the Book of Revelation*, leq. 593.

## Bophelo Lefatšeng le Lecha

**Bala Esaia 35:4–10, 65:21–25. Bophelo boo bo tla fapana hakae le boo re bo phelang ha joale?**

Ke ka makhetlo a 'maloa re bala ka ntho e ncha bukeng ea Esaia: “ntho tse ncha” (42:9, 48:6), “pina e ncha” (42:10), “ntho e ncha” (43:19), “lebitso le lecha” (62:2). Se secha khaolong ea 65 ke tlhophiso e ncha ea lintho. Ho na le khotso le kutloano libopuoeng tsohle tsa Molimo. Lithohako tsa selekane holim'a lefatše lohle ka lebaka la ho hloka kutlo le borabele (sheba le Levit. 26:14–17, Deutr. 28:30) li tla hlakoloa ka ho sa feleng, hobane sebe ha se sa le eo. Empa, hotla ba le khaphatseho ea mahlohonolo, matlo a bolulo, le lijo tse monate. Bophelo bo tla ba joang sebakeng se setle hakalo? Batho ba bang ba ipotsa hore na re tla khona ho tseba metsoalle le litho tsa lelapa, kamor'a hore 'mele ea rona e fumane ho se shoe 'me e busetsoe setšoantšong sa Molimo. Kamor'a hore Krete a tsohe bafunag, barutuo ba Hae ba ile ba khona ho mo tseba. Maria o ile a tseba lentsoe la Hae (Johanne 20:11–16). Thomase o ile a tseba chebahalo ea Jesu (Johanne 20:27, 28). Barutuo ba babeli tseleng e eang Emmause ba ile ba tseba mekhoha ea Hae ha ba lutse tafoleng ba ngoatha bohobe (Luka 24:30, 31, 35). Kahona, haeba 'mele ea rona e lokela ho tsoana le oa Jesu kamor'a ho tsoha bafung, haho potang re tla khona ho tsebana, 'me re ka sheba ho bo sa feleng ba likamano tse khutlisitsoeng. Re ka etsa qeto ka sebete ea hore, re tla tsoela pele ka likamano tsa rona, le bao re ba ratang ba tla be ba e-na le rona moo. “Moo teng balopolloa ba tla tseba, hantle joalokaha ba tsejoa. Lerato le kutloelo bohloko tseo Morena ka bo-cena a li jetseng meeng, mono li tla fumana ho thapolloha ha monatjana. Setsoalle se hloekileng le libopuo tse halalelang, phelisano 'moho ea setsoalle le manyeloi a hlohonolofetseng 'moho le ba tšepahetseng menoaheng eohle, ba hlatsoitseng liaparo tsa bona maling a konyana, litlamo tse halalelang tse kopanyang 'lelapa lohle la leholimong le lefatšeng 'moho (Ba-Efese 3:15)—sena se thusa ho ba karolo ea thabo ea balopolloa.”—Ellen G. White, *The Great Controversy*, leq. 677.

**“Ka baka leo, ha re tepelle. . . . Hobane hlomoho e chatsi ea rona, ea motsotso ona, e ntse e re sebeletsa letlotlo la khanya le tlolisang, le sa feleng; ha re fela re sa talime tse bonahalang, re mpa re talima tse sa bonahaleng; hobane tse bonahlang ke tsa mehla ena feela; empa tse sa bonahaleng ha li ka ke tsa e-ba le bofelo.” (2 Ba-Kor. 4:16–18). Ke joang lefatšeng la nakoana, le fetang, re ka ithutang ho itšoarella nthong tse sa bonoeng tse sa feleng?**

### Ho Ithuta Haloanyane:

Ellen G. White, “ ‘Behold, I Come Quickly,’ ” maq. 355–359, ho *Counsels for the Church*. Bala lingoloea tsena “Resurrection,” maq. 1082–1084, le “Heaven and New Earth,” maq. 863, 864, ho *The Ellen G. White Encyclopedia*. “Tsoho le nyolohelo tsa Morena oa rona ke bopaki bo tiileng ba tlhoho ea bahalaleli ba Molimo holim’a lefu le lebitla, le tiisetso ea hore leholimo le bulehile bakeng sa ba hlatsoang liaparo tsa bona tsa semole ba li soufatsa maling a Konyana. Jesu o nyolohetse ho Ntate e le Moemeli oa batho bohle, ’me Molimo O tla tlisa ba bonahatsang setšoantšo sa Hae ho bona le ho arolelana khayana ea Hae le Eena. “Ho na le malapa bakeng sa bafalli ba lefatšeng. Ho na le liaparo tse telele bakeng sa ba lokileng, tse nang le meqhaka ea khanya le lipalema tsa tlhoho. Tsohle tse re emisiseng lihlooho ka ho fana ha Molimo lefatšeng lena li tla hlakisoa. Lintho tseo ho leng thata ho li utloisisa ha joale, li tla hlaka. Sephiri sa mohau se tla menoloha kapel’a rona. Moo likelellonyana tsa rona tse fokolang li fumaneng pherakano le litšepiso tse robeliheng feela, re tla bona nyallano e ntle-ntle, e phethehileng ho feta sohle. Re tla tseba hore lerato la ka ho feleng le laetse litoko tse neng li bonahala li le boimahali. Ha re hlakomela tlhokomelo ea Hae e bonolo ea ea etsang hore tsohle li sebetse hammoho molemong oa rona, re tla qhomaqhoma ke thabo e ke keng ea hlaloseha.”—Ellen G. White, *Counsels for the Church*, leq. 358.

### Lipotso tsa Puisano:

1. Leha ba bang ba Bakreste (empa eseng kaofela) ba lumela ho tlang ha Jesu ho bonoang ka mahlo, ke sefe se ikhethang ka tšepo ea Baleti ho tlang la bobeli ha Kreste?
2. Litlhapi tse peli li ne li sesa ha e ’ngoe e re ho e ’ngoe, “Metsi a joang?” Tlhapi e ’ngoe ea arabela: “Eng ke Eng?” Taba mona ke hore re ka tloaela lintho hona hoo re sa lemoheng hore li matletse-tletse. Mohlala, ke joang, rona ba tsoaletsoeng sebeng, re tletseng sebe, ba phelang lefatšeng la sebe, re ka fela ra fumana kutloisiso e ntle ea kamoo bophelo bo bocha bo tlang ho ba monate kateng maholimong le lefatšeng le lecha? Ke hobaneng, leha ho le joalo, ho sa natsoe likhaello, re lokelang ho phehella ho lula re nahana hore na ho tla ba joang?
3. Ha ho potang hore, ho sa natsoe hore na maphelo a rona a tla ba joang lefatšeng le lecha, re tla phela ka bonngoe le bohle. Re ka etsa’ng, hona joale, ho ithusa ho lokisetsa mohla seo se etsahalang?

**Kakaretso:** Bible e bua ka sebete ka nako eo lefatše lena le tla boptjoa bocha ’me litšenyotse sebe li hlakoloa ka ho sa feleng. Bonyane, qetellong batho ba tla khutlisetsoa sepheong sa bona sa pele, ’me batho bohle ba tla phelisana hammoho. Bonngoe ba rona ba semoea ho Kreste, leha bo sa bonoe ka botlalo hajoale, mono e tla ba ntho e phelang ea ’nete ea bosafeleng.